

SECOT ALKARTEA

ESPERIENTZIA GITXIKO ENPRESARIEN AHOLKULARIAK

Alkarteko kideak jubilatutak dira, eta euren esperientzia eskaintzen deusie enpresari gazteei. SECOT-en Bilboko delegazioak hamar urte daroaz beharrean.

«Gure esperientzia oso baliagarria izan leiteke»

Josu Bidaguren |

Asko eta asko noiz jubilaiko zain egoten dira, baina, itxurea danetz, jubiletako gogoa ez da hain orokorra behargin ohi batzuen artean. Angel Zaldunbide, Joaquin Marti, Miguel Aretxabala eta Eugenio Zabala azken multzo horren barruan sartzen dira. Urte batzuk zirala jubilaio baziran be, gaur egun SECOT alkartean egiten dabe behar, euren gaitasuna eskarmentu eske hurreratzan diran gazteei —eta ez hain gazteei be— lagunduz.

■ Zer da SECOT?

Espainiako 22 uritan dagoan alkartea da. Horreetan, 700 enpresari ohi gagoz, 50 inguru Bizkaiko delegazioan. Gure esperientzia eta ezagutzea eskaintzen ditugu; oso baliagarria izan leikelakoan gagoz-eta.

Alkarte mota hau Estatu Batuetan sortu zan, 50 urteetako hamarkadean. Europara geroago heldu zan. Gureak, esatera-

ko, hamar urte inguru ditu, eta Rafael Escola-k sortu eban.

■ Nork eskatzen deusio laguntza SECOT-i?

Batez be, jente gazteak: enpresa bat sortu, frankizia bat ipini, lantegi bat handitu edo abokatuen bulego bat ipini gura dabena, adibidez. Jente gazte horren artean azpimarratzekoa da asko eta asko emakumezkoak dirala.

Bizkaiko Foru Aldundiko Lan sailak, enpresari gazteei laguntzeko DEMA ekimenarekin, ituna daukagu. Kontuan euki behar da sortzen diran negozio barrietatik %80k urte bi baino gitxiago irauten dabela. Lankidetzaren bitartez zenbaki horreek hobetu gura dira.

■ Zelako esperientzia izan dozue urteotan?

Oso ona. Esperientzia oso positiboa izan da. Gure ustez bai guretzat, bai bezeroarentzat be. Guretzat, behar egin eta ikasteko aukerea emoten deuskulako: 'forman' egotea eskatzen deus-



PABLO S. QUIZA

ABERASGARRIA

“Esperientzi hau oso aberasgarria izan da, bai, bezeroarentzako, bai guretzako be»

ZENBAKI TXARRAK

“Gaur egun sortzen diran negozio barri gehienak, urte bi pasau orduko zarratzen dira»

ku. Ganera, hona etorri orduko ez genduan alkar ezagutzen, eta orain oso lagun onak gara. Bezera be oso pozik gelditzen dira; laguntzea eskaini ondoren egiten jakezan inkestek dinonez, %90 oso pozik gelditzen da.

■ Pentsatu dozue inoiz 'barriro jubilatzea'?

Egun batzuk beste batzuk baino txarragoak izaten dira. Batzuetan, honelako beharra egitea ez dauela merezi pentsaten dozu. Guk ez dogu dirurik irabazten egindako beharragatik.

■ Alkartea itzi dauenik be egon da.

Bai, arazo askogatik ganera. Batzuk, gaixotu egin diralako, edo bestelako arazo partikular bat izan dabelako; besteak, beha-

rrak larregi eskatzen deusiela-ko, hau da, lege arloan-eta emoten diran aldaketak ezin dabezalako jarraitu, daukien jakintza maila atzeratuta gelditu dala-ko... Lehenago aitaturko moduan beharrak, ikastera, lege arloan emondako barrikuntzak ezagutza... eskatzen dau. Zure burua ez badozu gai ikusten horretarako, hobe da iztea.

■ Zerbitzuarengatik ez deusuela ordaintzen dinozue, baina, zuek dozuen bulegoa mantentzeko dirua behar da, ezta?

Laguntzea emoten deusku enpresak eta erakundeak erabiltzen doguz, batez be: BBVA, Iberdrola, enpresari alkargoa, merkataritza ganbarea...

LABURREAN

BIZKAIA

CC.00k mobilizazioak egingo ditu, ELE enpresarentzat behar egiten eben beharginei zor jakena emoten ez bajake

CC.OO Portugalete, Abanto, Alonsotegi eta Durangaldean etxerik etxeko laguntzan behar egiten daben langileekin bilduko da asteen zehar. Bilera horreetan langileek eta sindikatuek greba egitea erabagi leikie, behargin horrei zor jakezan 300.000 pezetak ordaintzen ez badeusiez. Maiatzerarte ELE enpresarentzat egiten eben behar, baina Gizarte Asegurantzak enpresea blokeau eban, ASAD enpresaren 1.000 milioiko zorra gaineratuz. Etxerik etxeko laguntzan behar egiten daben 100 lagun horreek 500 zahar zaintzen ditue.

SANTURTZI

Birritan atara behar izan ditue Mendizabal plazako bizilagunak, sua egoala eta

Juan Jose Mendizabal plazako 8 eta 12 zenbakidun eraikinetako bizilagunak birritan atara behar izan ditue euren etxeetatik, atzo gauean, sua zala eta. Aitatzekoa da eraikin horreek birritan hartu dabela su, aurtengo udan, Santurtziko udaltzainek emondako barriaren arabera beti be.

BARAKALDO

'Bilboren historia txikia bere zubien bitartez' erakusketea, Barakaldoko erakusketa aretoan

Barakaldoko erakusketa aretoan 'Bilboren historia txikia bere zubien bitartez' erakusketea ikusi ahal izango da irailaren 20a arte. Udalaren erakusketa aretotik azaldu dabenez, Bilboren 700 urteetan garrantzi handia izan dabe zubiek, «Bilbok bizitako guztia ikusi dabe: gerrak, uholdeak...». Erakusketan Bilboko zubi guztien historia azaltzen da: San Anton eta San Frantzisko —Bilboko zaharrenak—, Zubizuri —Bilboko barriena—, Areetako zubia, udaletxe parekoa eta Deustukoa. Erakusketea 11etatik 14etara, eta 18etatik 20etara egongo da ikusgai.